

Lars-Emil Johansen

2009-ip aasaani Siumup ataatsimiinnerani oqalugiaat

ULLUT NUTAAT – ANGUNIAKKAT NUTAAT

Nunarsuatsinni allanngueq allannguerusunnerlu ukiuni makkunani sumiluuniit takussaalersimavoq.

Allannguinerit taaku nunarsuarmioqatitta akornanni inuusuttut pikititsinerattut taaneqarsinnaasumik tunngavillit tamatta paasilluartariaqarpavut ilinniutigisariaqarlutigillu, politikikkut ingerlaatsimut siunissamittaaq sunniteqarnissarput kissaatigigutsigu.

Tamanna ersarinnerpaamik malunnarsivoq Barak Obama USA-mi ajugaarujussuarmat ”Time for change” ilisarnaatigalugu.

Ulluni makkunani nunarsuatsinni nunarpassuit allannguinissamik piunasaqaat tamanna malillugu ingerlatsipput, annertunerusumik annikinnerusumilluunniit iluatsitsiffiusumik.

Nunarsuarmi aningaasarsiornikkut ajornartorsiorneq, silaannaap allanngoriartornerata kingunerisaanik ajornartorsiutit pilersinneqartussatut aarleqqutigineqartut kiisalu nunarsuatsinni kinguaariit nutaarpassuit pitsaanerusumik toqqissisimanarnerusumillu siunissaqarnissaminnik piunasaqarnerat pissutsinik nunarpassuarni allanngortiterilernermit tunngaviuvoq.

Allannguimassuseq tamanna ukiup affaata kingulliup ingerlanerani Nunatsinnutaaq sunniuppoq.

Tamanna erserpoq siullermik Namminersorneq pillugu inuit taasisinneqarneratigut allannguerusuttut ajugaarujussuarnarneratigut. Aamma tamanna malunniuteqqippoq issatsiaannanguaq Inatsisartunut qinersisoqarneratigut Nunatsinni politikikkut pissutsit allanngortinneqarlunnarneratigut.

”Changer has come to Greenland!.

Piviusut ullumikkut taamaapput. Partiit allallu naallakkersuinermit suliaqartut pissutsit taamaannerannik takunnissimangitsut paasinnissimangitsullu ullutsinnut naleqqukkinnaareerput, piffissamilu aggersumi naalakkersuinnikkut sulinissaminnut periarfissaminnit peersinneqarumaarlutik.

Pissutsit killiffiat taamatorluinnaq ittoq uagut Siumumi nalunngilarput.

Tassami ukiut 30-it matuma siornatigut Namminersornerulerneq isumaqatigiinniutigigatsigu, tamatumalu kingorna inuit taasisinneqarneranni ajugaassutigigatsigu malitsigisaanillu qinersinermi Siumumi ajugaarujussuaratta, ullumikkutuulli inuiaqatigiit nutaamik ingerlaaseqalernissaat,

nutaamik politikkeqalernissaq nutaanillu Nunatsinni naalackersuisoqalernissaa inunnit kissaatigineqarpoq.

Aamma taamani pissutsit Nunatsinni allanngornissaat “time for change” piunasaqaataavoq.

Allannguianeq taamaattoq pilersikkumallugu uagut Siumumi akisussaassutimik tiguvugut.

Namminersornerulernissaq akueralugu taasivugut, naak kukkuneqarlunilu amigaateqakujukkaluartoq.

Tassami akisussaaffik tiguarput pissutsit nutaat piunasarisaattut Nunarput inuilu nutaamik ingerlaaseqalersikkumallugit, nalunnginnatsigu tamanna aqutissatuaasoq Nunatta siunissami namminersulivinnissaanut.

Namminiilivineq tassaajuarsimavoq ersarissumik anguniagarput.

Naalackersuisut kikkulluunniit pissusitoqqanik allannguniartut qinngarsorneqarlutillu uparuartorneqartartut nalunngikkaluarlugu taamaaliopugut.

Pissutsinik allannguneq tamanna iluatsippoq, naak partiitsinnut akisusimagaluaqaluni.

Taamaattormi Namminersorneq naammassivarput. Tamanna angugatsigu Nunatta kiffaangissuseqarluni namminiilivinnissaanut alloriarnerit pingaarnersaat tiguarput, soorlumi tamanna 1979-imiilli siunertarilersimagipput.

Kanngusuutissaqanngilagut, Nunatsinnimi siuariarnerit neriorsuutivut anguavut. Suliarumasarput piviusunngortipparput.

Soorunami aqutaani kukkusarsimavugut. Kukkunitta tamakku annersaat manna nalaapparput.

Ukiorpassuarni naalackersuinikkut pissaanermik tigummiarsimanitsinni pissutsinnillu nutarteriuarluta ingerlanitsinni puorsimavarput immitsinnut nutartissalluta parteerpullu nutartissallugu, pissutsinut nutaanut uagut nammineq pilersitseqataaffigisimasatsinnut naleqqussarlugu.

Kisianni asuliinnaq Siumumik ateqanngilagut. Partiitta siunertarisimanngisaannarpaa naammasseriikkavut tulluusimaarutigalugit uninngaarnissarput.

Inuit pikialaartitsineratigut pilersitaavugut, pikialaartitsisinnaanerlu partiitta qaqugumulluunniit ilisarnaatigiuartariaqarpaa.

Taamaattumik aamma piffissanngorpoq sumut ingerlaqqinnissarput nalilersussallugu isummersorfigissallugulu. Siunertarisariaqarparpummi partiitta Nunatsinni partiinit annerpaatut pitsaanerpaatullu inissisimaleqqinnissaa.

Parti siumut isigisumik ersarissumik politikkilik, inunnillu tatigineqarluni sulinerminik ingerlatsisoq.

Namminersornerup eqqunneratigut Nunatta oqaluttuarisaanerani kapitali nutaaq aallartipparput. Pissusiulersunut naleqqussarnissarput minnerunngitsumillu aamma taakkuninnga iluaquteqarnissarput suliarisariaqarparput.

Periarfissat siunniussallu nutaat Namminersornermit ammaanqartut piviusunngortitsinermik malitseqartittariaqarpavut.

Tamanna oqalulluataarnitsiguinnaq pissusitoqqanillu aliannaarsaaruteqarnikkuinnaq anguneqarsinnaanngilaq.

Tamanna anguneqarsinnaanngilaq kulturimik paasinnittaasitoqqamik tammalersumik attasiinnarniarsarinikkut, politikkikkulluunnit periaatsinik qangarsuarli nungullareernikunik attasinaannarnikkut.

Tamanna anguneqarsinnaanngilaq atornikunik isumalluuteqarnikkut, inuit anguniakkallu eqqarsaatigalugit.

Tamanna taamaallaat anguneqarsinnaavoq allanngortitsinikkut, isummanik suleriaatsinillu.

Namminersornerup tunngavia maanna qarmarneqartussanngorpoq, tamannalu pissaq Nunatta qaarsua toqqavigalugu.

Maannakkorpiaq pisariaqartippavut isummat pitsaasut nutaat, qulakkeersinnaassagutsigu Namminersulernitta malitsigisaanik inuiaat kivinneqarnissaat, tamannami Namminersornerup siunertarimmagu tamannalu najoqqutaralugu Namminersorneq ilusilersugaammat.

Suliassami tassani apeqqutaanerunngilaq kikkut naalackersuisuunersut kikkulluunniit illuatungiliuttuunersut. Apeqqutaanerpaavoq kikkut siunissatta ilusilersornissaani atorsinnaasunik silatuunillu isummorsorsut sulissutiginnissinnaanersullu aammalu kikkut polikerinik suliassanik naammassinninniarnissamut piukkunnarnerpaanik "sassaalliutissaqarnersut".

Taamaattumik pingaarnepaavoq immitsinnut qiviarnissarput, piffissarpullu tamaat atorlugu Nunatta naalackersuisortaavinik isornartorsuiinnannginnissarput.

Ulluinnarni partiit akornanni aporaassutaasartut qulaannut pilluta piffissarput siunissatta ilusilersornissaannut atornerusariaqalerparput.

Naqqaniit aallartissanngilagut.

Tassami tunngavippu aallarteqqaarattali pigisarput, partiitta uummataata tillenera, taannaajuarpoq.

Uagut parteerput partiinit allanit tamanit annermik kalaallisut kinaassutsitsinnik, kalaallisut kulturitsinnik, kalaallisut oqaatsitsinnik inuiaallu kalaallit tarnaannik illersuisuujuassaaq tunngaveqartuassallunilu.

Aamma uagut partiitsinni qaqugumuulluunniit annikillinngilluinnartumik Nunatta siunissami namminiilivinnissaanik siunertaqarnerput aalajangiusimajuartariaqarparput,

Aamma inuiaat kalaallit akornanni nammaqatiginneq – illoqarfissuarni nunaqarfinguaniluunniit najugaqaralarutta ataatsimut immitsinnut akisussaaffigeqatigiinnerput – qaqugumulluunniit qimanngisannartariaqarparput. Tamannarpiaavorlumi partiitta politikkiata tunngavia.

Inuiannut kalaallinut asanninnerput kulturitsinnik pingaartitsinerput allanillu nallersimaneqanngitsumik ataatsimuullaqqissuseqarnerput, qaqugumulluunniit Siumup ilisarnaatigiuartariaqarpai. Aamma taamaappoq nammineq sapinngissutsitsinnik upperinnittuarnerput, oqaatsitsinnik pingaartitsinerput nammineersinnaanitsinnillu upperinnittuarnerput.

Taakkua allanngortinngisaannartariaqarput, tassaasariaqarlutillu siumukkormiuulluassutsimut ilisarnaatigisassavut.

Allarpassuartigulli allanngortitsinissamut manna piffissanngorpoq.

Siunissami suliassavut pillugit nutaanik isummersornissarput pisariaqarpoq.

Partiprogrammerput nutartertariaqarparput, ullumikikut pissutsinut naleqqussarlugu.

Politikerit nutaat partiitsinnik ingerlatseqqittussat pisariaqartippavut.

Inuusuttut pikititsinerat nunarsuatsinni pissutsinik allanguimassutsimuttaaq ersiutaasoq, maanna partiitsinnut aamma apuuttariaqalerpoq.

Aallarteerpugut – kisianni suli suliassarpassuaqarpugut, politikerit sinniisorisavut partiittalu aaqqissuussaamera eqqarsaatigalugit.

Partiitta iluani piuumassuseq nutaaq pilersittariaqarparput, qaratsat nutaat sorsukkumassuserlu nutaaq atorlugit.

Aamma ullumikkornit anginerungaartumik paasissutissanik siammarterinissamut periarfissanik atuisariaqarpugut, ataatsimut anguniakkatta suliniutittalu siammarternissaanut.

Allatut oqaatigalugu takutittariaqarparput immitsinnuttaaq nutarteriffigisinnaalluta, parteerpullu nutartersinnaagipput, soorlu inuiaqatitsinni aaqqissuussaannermik nutarterisinnaasugut.

Suliassaq tamanna imaannaanngilaq, ullormiillu ullormut naammassineqarsinnaanaviarani.

Ullumikkut partiitta inissisimalernera nutaaq, tassa illuatungiliuttuulluni – piffissami sivikitsuinnarmi atuutissasutut neriuutigisatsinnik – atorluartariaqarparput partiitta nutarternissaanut inuiaqatigiinnilu isigineqarnitta pitsanngorteqqinnissaanut.

Taamaaliunngikkutta, massakkullu tamanna sularinngikkutsigu, taava naatsorsuutigisariaqassavarput suli ukiuni amerlasuuni illuatungiliuttutut inissisimanissarput.

Siumut Nutaaq kissaataanaanngilaq. Tassaallunili pisariaqavissoq naammassissallugu, partiitta siunissami atasinnaassuseqarnissaa qulakkeerseqassappat.

Politikki nutaaq ineriartortitassarput Namminersorneq pillugu inatsimmi najoqqutassaqaareerpoq.

Taanna tassaavoq – siunissami Nunatta namminersulivinnissaanik sakkukillingisaannartumik anguniagaqarnitta saniatigut – suliassatta aallartinnissaani toqqammavissarput.

Aammattaaq nunarpassuarni ullumikkut silaannaap allanngoriartornerata nassatarisaanik, aningaasarsiornikkut pissutsinik kiisalu sillimaniarnikkut pissutsinik tunngaveqartumik, pissusiulersimasut suliassatta tunngavissaanut ilaapput.

Nunarput qeqertaagaluarpormi – tamannali aningaasarsiornikkut, silaannaap allanngoriartorneranut nunarsuamioqatigiillu suleqatigiinneranni peqataanitsinni immikkut malunnaateqanngilaq. Tassami ullumikkut nunarsuamioqatitsinnut ilanngulluinnarsimavugut, siornatigut takusimanngisaannakkatsinnik.

Namminersulernitsigut Danmarkimut ikioqqulluta qinnuteqarsinnaanerput tamaanga naavoq.

Namminersorlutik oqartussat Danmarkimiit aningaasat pisassaat amerliseqqinneqarsinnaanngillat. Taamaattumik aningaasarsiornikkut ineriartortitseqqinnissaq uagut kisitta akisussaaffigilerparput.

Tamatununga peqatigitillugu oqaatigisariaqarportaaq Nunatta namminiilivinnissaanut periarfissaqassagutta aningaasatigut immitsinnut pilersortunngoqqaartariaqarnerput.

Taamaattumik politikikkut anguniakkavut nutaamik ilusilersortariaqarpavut, Nunatta siunissami aningaasarsiornikkut tunngavissaa inuisalu periarfissai, eqqarsaatigalugit.

Aalisarneq, takornariartitsineq, suliffissuaqarneq, sanaartorneq, assartuineq angallannerlu eqqarsaatigalugit – minnerunngitsumillu Nunatta pisuussutai uumaatsut, kiisami nammineerluta pigilernikuusavut, eqqarsaatigalugit nutaamik politikkiortariaqarpugut.

Taagukkanni taakkunani annerpaamik aningaasatigut iluanaaruteqarfiginerpaaffigisinnaasavut aalluttariaqalerpavut, soorunami innuttaasut peqqissuunissaat pinngortitamillu mingutsittaaliuinissaq tunulliunnagit. Aningaasatigut pissarsiffigisinnaasatsinnut tunuarsimaarnissamut ullumikkut akissaqanngilagut.

Atagu eqqarsaatersuutialunnguanik saqqummiussiffigilaarallarlassi.

Suliffissuaqarnikkut ingerlatsivinnik nutaanik Nunatsinnut ”qammaanerusariaqarpugut” nammineerlutalu pilersitsinerusariaqarluta. Nutaamik aallartitsiniartut ikiorsiiffiginerusariaqarpavut, nalorninermik, tatiginninnginnermik allaffissorpallaarnermillu ipitiinnartarnagit.

Sanaartorneq nutaamik aaqqissuussiffigisariaqarpoq akikillisaaffigineqartariaqarlunilu. Aamma sanaartoriaatsinik nutaanik, atortussanik pisiniariaatsinik nutaanik kiisalu pilersaarussiaatsinik nutaanik nassaartariaqarpugut.

Assartuinnermut aningaasartuutivut nunanut allanut unammillersinnaassutsitsinnut ullumikkut annertuumik sanngiinnerullisutigaaavut. Tamatumunnga Nunatta inissisimamut pissutaavoq, taamaattumillu inuiaqatigiit tamarmiulluta akisussaaffigisariaqarparput nunanut allanut unammillersinnaassutsitta pitsaanerulernissaa anguniarlugu sannguequtitta aaqqiivigineqarnissaa.

Nunatsinniit Nunatsinnullu usinik ilaasunillu angallassinermut akiusut appartittariaqarpavut, akikillisaataaumik tapiissuteqarnitsigut. Taamaaliornitsigut takornariartitsineq nioqputissanillu assartuineq akitigut unammillersinnaasunngortissinnaavavut.

Piuffissanngorpoq apersuusissallugu ilumut pisariaqavinnersoq sanaartornermi atortussatta tamarmik ullumikkutuut 3000 kilumiiterisut ungasitsigisumiit assartorneqartuarnissaat, naak kimmuk kangimullu nunanit sanilitsinniit pisiniarnissamut periarfissaqaralualuta.

Canadamik Islandimillu suleqateqarnerput ersarinnerungaartumik ilusilertariaqalerparput.

Nukissiuuteqarnermut aningaasartuutivut apparsartariaqarpavut. Erngup nukiliorfiliornissamut periarfissarissaarnerput eqqarsaatigalugu pissusissamisooruussaaq uuliamik ingerlatilinnik nukissiuuteqarnek sapinngisamik tamakkiisumik qimassagutsigu, sapinngisamik piaartumik.

Taamaattumik nukissiuuteqarnikkut periarfissanik allanik pilersitsiartuaarnerput tapersersortariaqarparput, minnerunngitsumik mallit nukingat kiisalu brint atorlugu nukissiuusiornek eqqarsaatigalugit.

Sermersuarput iluaqutigalugu imermik inuit imigassaannik pilersitsisariaqarpugut. Maannamut imermik tunisassiornissamik pilersaarutaasartut piffissarujussuaq atorlugu misissorlugillu isummerfiginiaaluusaartarsimavavut, utaqqisitsinitsinnilu sermersuarput aakkiartuaarpoq imerlu immamut koorusaaginnarluni, naak nunarsuarmiopassuit imermik inuit imigassaannik amigaateqaraluartut.

Maannakkut piviusunngortitsisariaqarpugut imermik tunisassiornek eqqarsaatigalugu.

Pingaarnerpaamilli aatsitassat Nunatsinni pigisatta atorneqarnissaat iluaqutigineqarnissaallu pillugu nutaamik politikiliortariaqarpugut.

Arlalitsigut eqqarsaatigisariaqalerparput inuiaqatigiit aatsitassat iluaqutiginiarneqarneranni qanoq inissimasariaqarnerisut, tassami aningaasatigut periarfissat aatsitassarsiornermiittut periarfissanit allanit tamanit annersaapput.

Aamma Nunatta inuia aatsitassarsiornermi qanoq akuutiginissaat nalilerniagassaraarput.

Aatsitassanik soqutiginaatilinnik nassaartoqarneri tamaasa oqallinnerit tusarniaanerillu kisiisa eqqarsaatiginngilakka.

Tamannami ullumikkut ingerlanneqareermat.

Pisariaqartipparput Nunatta inuisa sutigut tamatigut peqataanerunissaat, aamma aatsitassaqarfiit ilisimatuussutsikkut misissuiffigineqarneranni, aatsitassanik ujarlernermi kiisalu aatsitassanik piiiaanermi.

Nunatsinni innuttaasut piginnaasamikkut qaffassarneqasrnissaat qanoq ittunik periuseqarluta suliarissanerlutigu nassaariniartariaqarparput, ukiunimi tulluuttuni aatsitassarsiornermik ingerlatsineq sutigut tamatigut ullumikkornit annertunerujussuarmik peqataaffigisariaqarparput.

Nassuerutigisariaqarparput ullumikkutuut aalisarnerinnangajavimmik isumalluuteqarsinnaajunnaarluta, suliffissuaqarnermulli moderniusumut informationsteknologimik annertuumik iluaquteqarluta ikaarsaariartariaqalerluta.

Tamatumani pisariaqartipparput, ilinniartitaaneq, linniartitaaneq aamma ilinniartitaaneq.

Tamanna oqaatigisareernikooqaarput, aammalumi annertuunik naammassisaqarfigisareersimavarput.

Kisianni qanuiliuusissanik nassaarniartariaqarpugut ilinniartut ilinniarnerminnik unitsitsinnartarnerat anigorniarlugu nutaanillu periarfissarsiuussiniarluta.

Danmarkip avataani ilinniarfiusinnaasunik ullumikkornit annertunerujussuarmik nassaarniartariaqarpugut.

Tamatuma kinguneranik oqaatsit pillugit politikkerput allanngortittariaqarparput.

Tuluit oqaasii siunissami pisariaqartippavut – qallunaat oqaasijunngitsoq.

Namminersornerup atuutilerneratigut oqaatsivut pisortatigoortumik oqaatsit inissisimalerput.

Tamanna pingaartilluinnartariaqarparput, Namminersorlunilu ingerlatsinermi tamanna ataqqineqartariaqarpoq. Oqaatsitta atortinnissaat uatsserneqaannarsinnaanngilaq sumiginnarneqarsinnaananilu, ilatta oqaatsitsinnik ilinniarnissaminnik salliutitsinngippallaarnerat pingaartitsinngippallaarsimanerallu pissutiginnarlugu.

Oqaatsit tassaapput inuiaat kikkulluunniit kulturiata tillerpera, inuiaammi oqaatsiminnik annasaqarsimasut kulturikkut anersaartuserlutillusooq inissisimassapput.

Piviusut nutsikkat aqqutigalugit taamaallaat paasineqartarunnaartariaqarput. Nutserunneqarlutik piviusunik paasinninniartartut Nunatsinni amerlavallaarput. Ajoraluartumilli ullumikkut naalakkersuisuvut nutserisulerlutik akunnerminni isumaqatigiinniartariaqartassapput.

Ukiorpasuarini qallunaat Nunatsinnut suliarortut peqataatissinnaajumallugit sorpassuartigut aqqissuussisarsimavugut oqaatsillu marluiit atorlugit ingerlatsiniarsimalluta, naak Danmarkimiluunniit pissutsit taamaattut takorloorneqarsinnaanngisaannarsimasut.

Oqaatsitigulli politikki nutaaq iluatsissappat oqaatsitsinnik ilinniartitsinissamut periarfissat ullumikkornit pitsaanerujussuusariaqarput.

Siumup piffissami aggersumi piumasarisariaqarparput Nunatsinni tamarmi oqaatsitsinnik ilinniartitsineq piorsaaffigineqassasoq, Nunattalu avataaneersunik atorfinitsitsisarnerni piumasaqaatinut ilaatinneqalissasoq oqaatsitsinnik atuisinnaassuseqarnissaq. Aamma isumaqarpunga nunap pisortatigoortumik oqaasiinik oqaaseqartuunissaq inuiaqatigiinni oqartussaaffinnut qinigaasinnaanissamut piumasaqaataalertariaqartoq.

Aamma taamaappoq tusagassiuutivut eqqarsaatigalugit.

Marluinnik oqaaseqartuusugut nalunnngilarput Nunatsinni aviisitigut taakualu nittartagaasigut oqallittoqartoq qallunaatuujunerusoq, innuttaasut akornanni raadiukkullu oqallinnermit allaanerulluinnartumik.

Nunatsinni tusagassiuutit kalaalinngorsavinneqarnikuunngisaannarput.

Politikkimut tunngasumik tusagassiuutitigut allaaserinnittarneq tusagassiassanillu toqqartuisarneq nalinginnaasoq qallunaat eqqarsartaasiat qallunaallu periusii malillugit ingerlavoq. Taakkua sanianniippoq kalaallit oqallinnerat, isertukkatullusoq illuni inummiit inummut ingerlanneqakkajuttoq.

Naalagaaffimmi pissaanerit sisamaattut taaneqartartoq – tusagassiuuteqarneq – pillugu Siumut nutaamik politikkeqalertariaqarpoq. Nunatsinni tusagassiorneq kalaalerpaluttumik kalaallillu oqaatsivut atorlugit ingerlalertariaqalerpoq.

Meeqqat sumiginnakkat inuillu atugarliortut allat eqqarsaatigalugit erseqqissartariaqarpoq ajornartorsiutit tamakku Siumup pilersitarinngimmagit, naak ilaatigut taamatut saqqummiussisoqarniartaraluartoq.

Pissutsilli meeqqat inersimasullu ajornartorsiornerannut tunngassut ukiuni makkunani saqqummilaarnerulersimanerannut pissutaavoq, Siumup suliniuteqarneratigut tamakkua aallunneqarnerulersimanerat.

Uagunuku misissuinerit inuiaqatigiinni ingerlanerliortortatta atugarisaannik qulaajaasut piviusunngortikkivut ajornartorsiutillu ersarinnerulersillugit. Taamaalilluni ajornartorsiut iluarsiiviginiarlugit suliniarnerit tunngavissaqarluarnerulerput siunertalimmillu ingerlanneqarsinnaanerulerlutik.

Taamaakkaluartoq suli suliassarpassuaqarpugut.

Parteerput suli annertunerujussuarmik suliniuteqartariaqarpoq ajornartorsiutinik pilersitsisut annersaasa – tassalu imigassamik ikiaroorartumillu atonerluinerit – qaangerniarneqarnissaat eqqarsaatigalugu. Meeqqat eqqarsaatigalugit taakkununga suliniarnerput ullumikkornit sakkortunerulersittariaqarparput.

Meeqqat illui meeqqanik kikkunnilluunniit orninneqarsinnaasut illoqarfinni tamani pilersinneqartariaqarput.

Meeqqat illuini atuarfinnilu meeqqat nerisassaartinneqarnissaat sulissutigisariaqarparput. Aamma taakkunani kalaaliminernik nerisassat akoqartinneqarnissaat kalaallinillu sulisoqarnissaq soorunami qulakkeerneqartariaqarpoq.

Aningaasat meeqqanut suliniutinut atugassavut benziinap biilnut angallatinullu nuannaariutinut atorneqartup akitsuuserneratigut pissarsiariniassagutsigit tulluaannassaaq. Tassami sumut iluaqutaava innutaasut ilaat biilerujussulerlutik akisoorsuarnilluunniit nuannaariutinik angallatilersorlutik pissappata, uffa meerartatta ilaat naammattunik nerisassaqaanngitsulluunniit angerlarfissaqaratillu aqqusinermi angalaaginnartut.

Asasakka siumukkormioqatikka.

Maani saqqummiussorpakka isummat assigiinngitsut oqallisigalugillu isummersorfigineqarsinnaasut. Isumaqarpunga maanna piffissanngortoq tamatta isummersornissatsinnut suliniaqataanissatsinnullu. Partiitoqannguarput asarput qinersinermi kingullermi ajorsarnermi kingornagut tupatsitaasimanerminit makeqqissappat ilungersortariaqarpugut.

Qinersinerup inernera immaqa nuannaarutiginnartariaqarparput aliasuutigivallaarnagulu.

Tassami parti sunaluunniit ikilersitinngivilluni kimillatsitinngivillunilu ukiuni 30-ini siuttuusinnaanngilaq.

Taamaattumik maannakkut ikitta mattusersornissaannut nukittorsarnissatsinnullu piffissaq atorniarfigu, qinersinerup tulluup kingornagut nutaanik anguniagaqarluta, akiuussinnaassuseqaleqqissimalluta, nutaanillu sakkoqarluta sassaqqissinnaalernissarput siunertaralugu.

Isumaqarpunga suliassaq taannarpiaasoq massakkut aasaanerani naapeqatigiinnitsinni aallartittariaqarparput. Siumut isigisariaqarpugut, immitsinnullu piffissaajarpallaarniaveersaartariaqarpugut pereersut allannngortissinnaajunnaariikkavut oqaluuseralugit.

Taamaakkaluortoq sorlavut puiunngisaannartigit, kalaalinngorsaanerpullu tunuarterfiginngisaannartigu pissaanermik tigummiagorusunnerput piinnarlugu.

Kinaassuserput sapaginngisaannartigu, inuiaallu kalaallit tarnaat qimanngisaannartigu. Kalaallip nunamini tamakkiisumik oqartussaasuunissaa, nunami pisuussutaanut piginnittussaasuunissaa, namminerisaminik kultureqarnissaa namminrisaminillu nunaqarnissaa qaquguluunniit tunniutiinnarfiginngisaannartariaqarpavut.

Oqaluttuarisaanerput tigoqqinniarlugu qasusuilluta sorsunnerput ingerlateqqittariaqarparput, ullunilu aqquusaakkatsinni ileqquliussat pissutiginnarlugit sorlaqarfivut pilliutiginnngisaannassavavut.

Kisianni soorunami politikkerput siunissamut, Nunatta inuisalu pisariaqartitaannut naleqqussartuartaqarparput.

Tamanna pissusissamisuginnarpoq.

Pikialarneq ineriartornerlu siumukarnermik nassataqartarput. Unittoorneq toqusoorneruvoq.

Maanna piffissanngorpoq aquupput ipissallutigu, ingerlavippullu allannngortissallutigu.

Asuliinnaanngitsoq.

Aamma taamaappoq folketingimi sinniisoqarnerput eqqarsaatigalugu.

Nalunaarutigisinnaavara Atlantikup Avannaani Suleqatigiiffik pilersitseqataaffigisara maanna qimattussanngorakku, tassungalu taarsiullugu folketingimi socialdemokraatit nutaamik pissanganartumillu suleqatigilertussanngorakkit.

Namminersorneq atuutilermat Atlantikup Avannaani Suleqatigiiffimmik pilersitsinitsinni siunertarisatta pingaarnersaat piviusunngortinneqarpoq.

Siunissami anguniagassarilikkatta ilaatigut pisariaqalersippaat Danmarkimi kimittuumik suleqatissarsiornissaq, Siumumiit sunniuteqarfigilluarsinnaasatsinnik.

Partiitta siulittaasua isumaqatigiissuteqarfigalugu augustusimiit aallartittumik qallunaat socialdemokraatit folketingimi suleqatigilissuakka.

Tullianik folketingimut qinersinissaq nalunaarutigineqarpat maanna politikkikkut sullivimma kingullersaat qimassavara, neriuutigeqaaralu Siumup programmia nutaaq nassarlugu, parteerpullu qiimanermik nukinnillu ulikkaartoq, nutartersimasoq inuusussisimaqisorlu, aallartitseqataasimasut ilaattut nuannaarlunga ullut politikeriuffikka naggataarsinnaajumaarlugit.

Ataatsimiilluarisi, asannittumik inuulluaqqullusi

Lars-Emiili